

Komunikadu Imprensa

Dili, 9 Maiu 2024

NOTA BRIEFING KONA-BA DISPUTA KONTRATUAL ENTRE ENERPROCO HO TIMOR GAP, E.P.

Refere ba artigu ne'ebé publika husi HATUTAN.com iha loron 4 fulan-maiu tinan 2024, ho títulu **"Konsidera Violaasaun Komtratal, ENERPROCO Lori TIMOR GAP ba Tribulal Internasional Arbitajen"**, TIMOR GAP, E.P. hakarak halo klarifikasaun tuir mai:

Ho surpresa TIMOR GAP hatene kona-ba artigu ne'ebé HATUTAN publika ba disputa entre TIMOR GAP no ENERPROCO no mensiona faktus ne'ebé falsu ka deskreve parsialmente ho forma ne'ebé la loos. TIMOR GAP nia jestor atuál no funsionáriu sira la hetan kontaktu husi HATUTAN no la fó informasaun ruma kona-ba disputa ne'e. Alein de ida ne'e, lori mós ba TIMOR GAP nia atensaun katak komunikadu imprensa ida-ne'ebé ENERPROCO fó sai ho asuntu hanesan, ninia konteúdu hanesan mos ho artigu ne'ebé iha HATUTAN nian.

Haree ba publikasaun ne'ebé la ho faktus no la loos, jestor TIMOR GAP nian ho espíritu transparénsia tomak, deside atu fó sai komunikadu imprensa ida-ne'e hodi hatur lia-loos no klarifika faktus báziku balun ne'ebé relasiona ho alegasaun disputa ne'ebé iha, hodi defende onra no reputasaun TIMOR GAP nian.

Iha tinan 2020 asina ona Akordu Servisu ida entre jestor anteriór TIMOR GAP no ENERPROCO ho tipu kontratu ajudikasaun direta.

ENERPROCO nu'udar kompañia ne'ebé fornese servisu konsultor (consultant service), nia baze iha Houston (Texas) Estados Unidos Amerika. ENERPROCO la'ós investidór ida iha Timor-Leste.

Faz parte husi Akordu Servisu entre TIMOR GAP no ENERPROCO, husi parte rua ne'e halo Akordu seluk ida hodi halo servisu ba Avaliasaun Teknika Kampu Bayu Undan (BU) Faze 2 CCS nian iha 16 Maiu 2023. Kontratu ne'e nia durasaun mak fulan 19 (hahú husi Maiu 2023 to'o Dezembru 2024).

Tanba hare ba irregularidade sériu iha prosesu aprovizionamentu ba kontratu ne'ebé fó ba ENERPROCO, no mos fatór relevante sira seluk, no tuir nia direitu kontratual, iha 18 Outubru 2023 TIMOR GAP fó sai karta terminasaun ba ENERPROCO, ezerse nia direitu sira ne'ebé prevee iha Akordu Servisu mensionadu iha leten. Iha karta terminasaun ne'ebé hanesan, TIMOR GAP mós husu suspensaun imediata ba atividade hotu-hotu ne'ebé relasiona ho Akordu Avaliasaun Teknika Kampu Bayu Undan (BU) Faze 2 CCS nian. Karta terminasaun ne'e hetan rekoñesimentu no simu husi ENERPROCO iha 25 Outubru 2023.

Hafoin karta terminasaun, atu proteje direitu no interese TIMOR GAP nian, TIMOR GAP husu ba ENERPROCO atu apresenta relatóriu sira ho referénsia ba ámbitu servisu ne'ebé konkorda ona ho TIMOR GAP ba revizaun téknika hodi konfirma servisu ne'ebé ENERPROCO deklara hala'o ona tuir ámbitu Akordu ne'ebé iha, hodi bele prosesa pagamentu sira. To'o ohin loron, TIMOR GAP selu ona fatura hotu-hotu ne'ebé ENERPROCO fó sai tuir akordu ne'e, no jestor atuál TIMOR GAP nian halo ona pagamentu ba faturas 5 ba ENERPROCO.

Alein de ida ne'e, ENERPROCO mós hetan benefísiu husi projetu TIMOR GAP sira seluk husi Outubru 2020 to'o Outubru 2023.

TIMOR GAP surpresa uitoan haree ba publikasaun iha media nasional kona-ba pedidu arbitrajen husi ENERPROCO ba Tribunal Kamara Internasional Komersiu, iha Singapura, wainhira diskusaun no klarifikasaun entre ekipa téknika ENERPROCO no TIMOR GAP sei kontinua la'o hela, liuliu kona-ba servisu sira ne'ebé hala'o hafoin TIMOR GAP hasai karta notifikasaun ba suspensaun servisu ENERPROCO nian.

TIMOR GAP la simu deklarasaun ne'ebé ENERPROCO halo kona-ba TIMOR GAP relasiona ho pagamentu ne'ebé ENERPROCO hato'o ba públiku. Tanba ne'e, TIMOR GAP sei afirma nia direitu sira iha forum nebe apropiadu.

Remata